

Editorial

4 • AWE **Mainta** | Dialuna OCTOBER 4, 2004

Un orcan y un candela a crea problemanan cu no mester ta problema

Algun siman despues cu Aruba a sinti influencia di orcan Ivan, ainda e situacion no ta bou di control y keto bai e isla ta muestra di tin cosnan pa drecha, tanto riba e parti humano como riba partinan material.

Mas cu cuater siman atras diferente instancia y esnan cu ta forma parti di e comision di calamidad a hinca un plan den otro cu mester a sirbi interes di tur afecta y den forma rapido brinda asistencia y ayudo na esnan cu ta rekeri esaki.

Simannan a pasa y mientras cu e ayudo a ser bon hinca den otro y hopi hende a ricibi e ayudo necesario, ainda por mira cu nunca e instancianan tabatin un calamidad aki bou di control.

E incapacidad ta sigui muestra su mes cada dia y mientras cu Gobierno a trata y insisti na muestra su bon boluntad, diferente departamento cu ta regarda Gobierno, ta fayando barbaremente den cumpli c'un comunidad cu ta sigui sinti efecto di e mal tempo aki.

Ta inexplicabel pa mira cuanto sushi ainda tin plama rond, cuanto santo ta benta riba camindanan publico, stagnando trafico, creando peliger pa automotilistanan y buracanan cu ta un peliger pa bida humano.

Mientras cu tin politiconan di gobierno ta gaba raportnan di Banco Central cu turismo a aumenta, na insistencia pa e isla ta limpi, pa e isla ta agradabel pa mira no ta ser scucha ya cu e no ta existi.

E yobidanan a crea hopi daño, nan a crea hopi incomodidad y despues di basta siman, ainda pueblo ta confrontando e incomodidadnan aki, mescos cu nan ta un dia despues di e tempestad.

Tin e canalnan hundo banda di retonde Las Americas, cu ainda ta sera cu e tablanan cora y blanco di

DOW, como si fuera pa drecha e situacion aki ta costa asina hopi, mientras cu tin sero di santo blanco na Barcadera, cu por ser usa pa tapa e buracanan aki y duna e sitio su bista original bek.

A cuminsa yena e canalnan cu awa a coba cu santo bruin pero a para cu esaki, loke riba su mes ta un bon decision, ya cu tin santo blanco suficiente pa yena e buracanan aki y asina elimina e bista mahos cu tin na e sitio aki.

Den centro di Oranjestad, cayanan ta muestra mahos, yena cu santo y stof, y ta duna un bista slordig na nos bishitantenan cu tanto nos tin mester. Y no ta pa e bishitantenan so e ta importante, pero pa nos propio hendenan cu ta cana den stof fini di tur dia cu autonan



La Linda na Candela - Foto Archivo



Victor "Toko" Winklaar

ta lanta ora cu nan pasa, ya cu ningun departamento a tuma e iniciativa pa limpia nos ciudad.

Den diferente barionan ainda por mira e efectonan di e mal tempo, caminda a lubida di bai duna un man, lubida di drecha cosnan cu no ta costa mucho pa drecha y ta como si fuera nos ta sperando riba un otro tempestad.

E incapacidad aki ta creando molester den pueblo, e ta creando disgusto ya cu en realidad e ta confirma cu nos no ta diferencia mucho di Haiti cu no tin fondo pa drecha e pais, y nan ta sigui cana den lodo y desperdicio, mientras cu aki na Aruba e situacion no ta diferente.

Cuanto ma tempo lo tin cu tuma, cuanto mas pueblo tin cu spera prome cu e isla ta bek na normalidad? Pero mas cu tur cos, cuanto mas saludi di pueblo tin cu bai perdi pa motibo di incapacidad y inefectividad di nos serviccionan publico?

Pa colmo ta presenta e siman cu a pasa otro desaster tragico, ora cu henter e blok di propiedad di La Linda NV a kima den centro di ciudad, paralizando e centro comercial pa algun dia, y awe nos ta habri siman cu mesun situacion, caminda un parti di e caya principal ta sera y tur hende por contempla un bista mahos di un edificio cu no ta sirbi pa nada mas.

Acaso no tabata apto pa bashe abou ayera, pa e simpel razon di seguridad di hopi hende cu ta bai den centro pa traha y pa haci compras? Acaso ayera no tabata e mihor dia pa limpia e lugar pa motibo cu no tabata dia di trabou? Acaso ta bai laga e situacion aki permanece pa varios siman mescos cu a pasa cu Ivan?

Hopi pregunta pa contesta pero un solo instancia cu ta responsabel, cu ta Gobierno di Aruba cu su serviccionan publico.